





貴縣同附郭三十四年巡撫閻興邦奏省新貴縣併入焉東至龍里縣界三十里西至安順府清鎮縣界二十五里南至龍里縣界六十里北至修文縣界六十里東南至龍里縣界八十里西南至定番州界五十里東北至開州界八十里西北至修文縣界七十里廣袤各百餘里與府屬犬牙相錯山川形勢已詳府志官設知縣一教諭訓導各一典史一田畝成熟者八萬三千一百八十畝有奇東北鄉水旱無虞多屯田而糧重西南鄉稍旱則歉多科田而糧輕屯田二萬八千二百有奇科田五萬五千有奇歲徵秋糧

正米一萬六百三十八石有奇銀一千五百五十五兩有奇俱加一五耗秋糧正米歲支左右城守三營兵糧及廩生餼米餘米耗米糶價批解正銀坐扣春夏二季驛費耗銀批解歲徵銀米每十戶立一頭人十頭人立一寨長照數催納社倉米二百八十一石三斗九升零常平倉穀八萬二千四百一十石重農捐輸溢額穀七百七十石有奇徵收學租米七十二石有奇為賑濟府縣學寒生費徵收官莊米五百八十七石有奇為支放孤貧口糧縣轄城內外四保及各里屯堡村寨四百有奇共居民四萬七千八百四

十一戶道光六年巡撫嵩溥奏委員清查苗產俱載明戶冊漢民不得夾雜牽連學額文生歲科試皆取二十名武生歲試取二十名舊有土司曰喇平乾隆二十八年土司宋維新因病辭退承襲無人隨裁塘汎十四大道四塘曰阿江舖曰湯粃哨路通清鎮曰龍洞舖曰黃泥舖路通龍里僻徑十塘通修文者曰老鴉關班竹園札佐通開州者曰馬屎巖大羊場通定番者曰大水溝花狃狃楊井青巖哨距青巖之十里又有塘曰桐木林深箐密中有雞扒坎介於兩塘之間宵小潛踪經縣令詳請設卡會同青巖桐木

兩汎往來巡緝通廣順者曰石板哨皆奸徒往來出入之所稽查宜嚴皇華驛在城內上距清鎮十五里至亦資孔入滇境下距龍里六十里至玉屏縣達楚境距縣北三十里爲龍場舊設驛丞一員後裁以貴州衛守備管理今歸於縣額馬六十四匹日支草料銀五分站夫一百名日支工食銀四分場市有八廠有修文之紅白二巖及開州之白馬洞均產水銀由縣招丁採辦月納稅課按旬報查水銀出於硃砂因火熬煉而成廣雅謂之瀕仙家謂之汞以其形流動不止色白如銀故曰水銀黔書作砒硃非也別無銅

鉛等廠四境不通舟楫所屬牛渡南溟龍洞四方濟
番諸河皆有橋以利行旅苗有宋家蔡家狝家花苗
諸種與府屬同

龍里縣

龍里縣在府治東五十里唐宋爲羅甸蠻地元置龍
里縣屬龍里州明洪武二十三年改置龍里衛二十
九年陞爲軍民指揮使司

國朝順治十五年裁指揮設守備康熙十一年裁衛設
縣設知縣一教諭一訓導一典史一其境東至貴定
縣梳粧石界三十里西至貴筑縣黎兒關界二十五

里南至定番州區街界五十里北至本府狗場寨界
九十里東南至本府毛箕堡界四十里西南至本府
中曹司界三十里東北至貴定屬新安界三十里西
北至本府虎墜司界五十里保障會城際喉要地城
週圍五里三分計八百四十五丈一尺高一丈四尺
登以石明洪武二十三年建歲久傾圮乾隆二十七
年重修門四紫虛山今名寇山石骨嶙峋曲徑盤繞
建紫虛閣其上山在城內龍架山在城南一里壁立
千仞軼雲造漢縣之鎮山也下有雷雲洞洞下甚深
軒豁爽朗石乳嵌空鮮潤欲滴明巡撫郭子章題曰

雕雲洞左十餘丈許有一洞水從洞出冬夏恆流近城田畝以資灌溉有小溝分引入城人多汲飲城西一里有馬鞍山城北二十里有雲臺山高五里許磅礴蜿蜒橫亘數里頂有寺城西三十里有長衝山昔爲苗蠻出入之所成化間置堡哨以守之城西南五里有蓮花山山腹有洞深不可測又有蓮涇鯉魚石在城西五里長可五六尺許鱗甲欲動原溪其源出縣南二十里朶花山之龍洞逕縣西五里有廣濟橋俗名水橋爲往來官道轉龍灣水注之又梅子關水注之簸箕河源出城東北五里之龍潭分爲二一由

五里橋入於原溪一由龍關遶城東又折而北龍架山水陡坡水竝入焉流至簸箕橋與原溪會下流滙於甕城河加牙河在城東源出縣東南之谷者寒流入大平伐司之甕首河呼應泉在城南五十里聲泉出龍里廢州在城東南五十里龍里舊縣在城西龍頭營在城東十五里顧祖禹方輿紀要天啟初安邦彥犯會城撫臣王三善自新添抵龍頭營敗賊兵奪龍里是也三牌在城東南六十里方輿紀要天啟三年安邦彥再犯會城使賊黨何中尉據龍里王三善遣副將祁繼祖等下龍里破蓮花堡燒上中下三牌

賊砦百餘龍里之路始通是也高寨在城西十五里
紀要王三善克龍里引兵復進奪高寨七里衝乘勝
進兵畢節舖遂克會城是也學額八名城內設有義
學一所分經蒙二館道光十年始建蓮峰書院田畝
現在成熟者三萬二千三百五十四畝近城平坦處
水旱無虞餘皆山高水冷歲收瘠薄惟下排五堡八
寨田疇寬廣水泉足資灌溉稱膏腴焉額徵正米二
千四百七十八石六斗四升四合六勺每石加耗一
斗五升除支放兵糧廩米餘米批解道庫正額條馬
銀一千四十九兩五分二釐徵差人丁六百三十丁

每丁徵銀二錢共徵銀一百二十六兩乾隆四十三
年奉文將人丁攤入田畝共徵條丁馬館銀一千一
百七十五兩五分二釐坐扣春夏驛站經費每兩加
耗銀一錢五分常平倉額貯穀三萬五千七百六十
七石七斗溢額穀七十八石新建義倉一所兵糧於
秋米內支放不需他處撥運市斗準倉斗一斗七升
城鄉集場五處小場大壩羊場比孟場灣寨場虎場
以卯酉寅未日爲期樹宜松柏杉楓茶蠟之屬近多
橡樹境內無銅鉛礦廠亦無稅課苗有三種白苗青
苗狝家苗久經向化力田輸賦間有入學者轄四土

司大谷龍司元時宋國以功授宣撫司傳至明嘉靖
十三年改授大谷龍長官司今承襲有印小谷龍司
元時宋幕以功授小谷龍安撫司明嘉靖十一年改
授長官司今承襲無印羊場司明洪武二十三年以
功授長官司今承襲有印龍里司元爲龍里等寨長
官司明洪武五年土酋何有善歸附改置今承襲土
舍通計漢莊一百六十有奇苗民共計四十餘寨東
關在城東一里西關在城西一里又城西五里有永
通關三十里有長衝關又有黎兒關籠從關在城東
二十五里元設嚙聳古平等處長官司危峰插天路

入雲表亦名雲頂關查慎行詩所謂極目雲生處到
來雲滿身也設有一汎九塘大道五僻路四城中駐
劄定廣協把總一員外委一員兵十名羅甸驛
額設馬五十匹站夫一百名馬夫二十五名每季請
領驛費銀八百三十九兩一錢遇閏按數加增腰站
在城西二十五里谷腳下至貴定六十里上至省城
五十里無渡口南境歷谷冲甲架毛箕可達定番廣
順北境歷虎場可達開州修文風俗與貴筑同
貴定縣

貴定縣在府治東一百一十里漢故且蘭縣地宋麥

新地嘉泰元年改爲新添元置新添葛蠻安撫司屬湖廣行省後改屬雲南行省明洪武二十二年置新添千戶所屬貴州衛二十三年改爲新添衛屬貴州都司二十九年陞軍民指揮使司萬歷三十六年析新貴縣定番州地置貴定縣於平伐司地

國朝康熙二十六年省衛入縣移至衛城設知縣一教諭一訓導一典史一其境東至平越直隸州界二十里南至定番州界一百二十里西至龍里縣界三十里北至平越直隸州界五十里東南至麻哈州界二十里西南至龍里縣界五十里東北至平越直隸州

界四十里西北至開州界五十里廣四十八里袤一百七十里城周七里三分計一千一百四十二丈有奇高一丈一尺甃以石門四明萬歷十三年築石城於平伐司地康熙二十六年始築今城文筆山在城南六里雲霧山在大平伐司西南上有九池曰九龍池相近有冗刀山狀如列戟宋末有保郎者立砦此山故址猶存又有谷峽山城北十里有山曰寶陽諸峰環向遠者如拱如衛近者如俯如揖登其上則諸峰皆在几席下也南四十里則有白馬山峻石巉巖上有大池深不可測又南有連珠山上有坪極闊中

起十二峰一水旋繞四山羅列牟珠洞在城西二十里大道旁俗名母猪洞明庶子邛禾實易名馮虛其後洞曰雷鳴後鎮遠知府陳奕漣復易今名洞口石笋一株大可數圍矗立十餘丈秉燭深入則石乳結構嵌空玲瓏雲譎波詭莫可名狀內有羅漢大土石像妙麗莊嚴石鐘鼓叩之有聲石紋皆作梅花瓣皎瑩如玉他人物鳥獸之形不可殫紀方輿紀要天啟初安邦彥圍貴陽撫臣王三善自平越赴援至母猪洞明日次新添是也烏龍洞在城南百里烏龍潭水出其中深窈難窮中分爲二澄潭內蓄急湍外流靈

物之所宅也天靈洞在平伐司疊石如雲又名垂雲洞三門洞在城北十里寬容萬人有東西三門儼然城郭海馬洞在城東五里傳洞中有物如馬鱗甲光怪或出與牝馬交卽產名駒但不可常遇云又有崆洞山西華白衣諸洞倒影石在平伐司東五里山石壁立明如懸鑑數十里內村落田壠樹木泉水皆納影於其內觀者駢闐土人苦之剗削失其光入字河在城東二里兩水合流有石中分如入字築堰灌田麥新溪在城西流合入字河南壩河在城南四里翁樹河在城南四十里翁黃河在把平司翁黃山下司

南有羅鵞溪入焉乾溪在城西十里以上諸水俱入甕城河甕城河在城西二十里自府屬龍里交界之高坡發源逕龍里東北諸境入縣界下流合清水河有橋爲黔楚大路卽元甕城司廢址也方輿紀要官軍討邦彥退屯威清苗狃大掠龍里至甕城河卽清水河亦名清水江在城西北三十里上自南明河流滙府境諸水自巴香合甕城河又東北經開州界至巖門入烏江三岔河在小平伐司三水滙流合於甕城河十萬溪在城北四十里明總兵石邦憲率師十萬圍苗賊於此故名雍真河在平伐司西南元雍真

長官司以此名城西有馬桑關東有玉杵谷蒙二關馬桑道頗險峻屢經修治漸就坦夷玉杵一帶地低傍河春漲時頗礙行人近已改就新路稍遠里許由城西歷乾溪甕城至新安三十里入龍里界由城東歷巖頭至谷蒙二十里入平越界田畝西南鄉者有甕城河洛白河諸水滋灌向爲沃土西北地稍瘠現在成熟田一萬九千三百四十一畝有奇徵米三千零六十六石有奇徵銀三千一百八十兩有奇縣屬漢苗錯處苗戶九百四十有奇男婦七千一百六十餘名口城中駐劄新添營都司一員千總一員兵一

百五十名分防新安把總一員兵十三名分防舊縣把總一員兵三十八名分防平伐千總一員兵六十五名分守各塘汛兵八十八名學額文生歲科試皆取十二名武生歲試十二名土司四小平伐長官司本元雍真長官司明洪武十五年置小平伐長官司授土苗宋斌保又洪武四年授宋臣爲大平伐長官司今並承襲平伐長官司今庭姓承襲新添長官司宋開寶時真定人宋景陽平定諸蠻因新置大萬谷落總管府授之洪武元年改授宋仁新添長官司今仍之平伐小場民屯錢糧向在舊縣徵收惟新添

所屬赴本地完納縣倉貯米一萬一千三百二十七石穀八千四百八十六石分貯本城舊縣平伐小場四處其糧於秋米內支放又撥運入寨兵米每歲一千二百石至四百石不等驛曰新添額設馬五十匹夫一百名舊縣洛白河均設有渡船場市四又東北一徑通都勻府計一百二十里樹木惟青桐刺楸楊槐餘木不甚相宜產紫草苗有青苗花苗狃家獐狍與各處同別有苗在平伐者曰平伐苗獐衣短裙婦人桶裙縮髻祭鬼殺牲葬以木槽性喜鬪又平伐有瑤人自粵西遷來男女衣青勤耕種採藥行醫俗尙

樸厚又有蠻人性獷戾以丑戍爲場期散處山谷勤耕作服色多青藍葬不用棺餘與花苗同又狝狠有金黎王等姓衣服言語與漢人略同知同姓不婚遇親喪長子居守七七日期滿乃敢出名曰放鬼如貧不能守必以次子或長孫代爲之守性尙醇謹是苗之獷悍醇良亦各以其類也

修文縣

修文縣在府治北五十里漢爲牂柯郡地宋爲乾壩龍場元爲落邦札佐等處長官司明洪武五年置劄佐長官司屬貴州宣慰司崇禎三年改置敷勇衛屬

貴州都司是年以青山長官司地置于襄守禦千戶所以貴州前衛故絕六屯並割底寨司地置熄烽守禦千戶所以宣慰司水外六目之地置濯靈守禦千戶所修文守禦千戶所均屬衛

國朝康熙二十六年改縣以衛所入焉設知縣一教諭

一訓導一典史一其境東至開州馬蹄關界六十里西至大定府黔西州索橋界五十里南至貴筑縣鷓鴣鴿箐界四十里北至黔西州黃沙河界一百里東南至貴筑縣三重堰界六十里西南至安順府清鎮縣茶盤寨界五十里東北至遵義府烏江界一百四十

里西北至黔西州陸廣河界六十里廣袤百餘里城周五里九分高一丈八尺登以石門凡四城有屏山俯眺城郭川原如畫西望山在城西北六十里巔有池曰鳳凰闊可里許前三峰曰翠屏曰目遊曰莫若皆壁立萬仞蒼松虬結而目遊更奇有疊石如浮屠踞嶺絕險處有盤陀石上平下削又小峰曰模羅上有小澗水落懸巖間如飛練澗左雙石如柱曰天門南望山在城北二十里綿亘數十里抵開州境與西望山對峙俗呼爲雌雄山城東南曰龍岡山半有東洞明王守仁謫居龍場游息其中石上鐫

有陽明玩易窩五字洞口有陽明小洞四字洞中爽朗軒豁可坐百餘人旁有何陋軒君子亭舊址又城西二十里有蜈蚣坡卽當日瘞旅處紅巖在城北七十里相連爲白巖有砂廠城北五里有三潮水日盈縮者三時至則奔騰怒涌時逾則音響俱消白馬潭在城北門外溪流至此渟涵澄澈傳有神物居之陸廣河距縣西北五十里卽烏江也舊爲水西驛道有渡曰陸廣渡王文成曉發詩所謂白鳥去邊迴驛路青巖缺處見人家是也方輿紀要載前安邦彥之亂巡撫王三善旣解會城之圍分軍屯陸廣以逼之邦

黔南諸冊卷二
三
彥糾羣賊攻陷陸廣勢益張旣而官軍四集邦彥暨陸廣以自守議者謂陸廣去大方百七十里前後左右皆羅鬼巢窟王三善之敗以失地故也後朱燮元督五省之軍分道並進而親帥大師駐陸廣逼大方奇兵四合乃克之有陸廣城水口砦聶石壩克仲壩皆水西要地也

國朝康熙三年討安坤吳三桂檄提督李本深統四鎮兵由大方之六歸河會剿屯糧於三岔河期首尾夾攻而檄文誤書六歸爲陸廣於是本深駐兵陸廣黔蜀糧儲亦盡屯於陸廣鎮西三桂軍於龍場外援不

至夷勢益張適水西土目安如鼎遣人偵黔營虛實爲本深所獲始知滇兵被困乃使爲鄉導鼓勇進兵卽其處也田畝近城及熄烽札佐羊郎底寨等處土闊山平素稱腴壤餘皆磽确之地現在成熟田二萬五千七百二畝二分七釐有奇歲徵米四千七百七十二石一升有奇徵銀三百五十兩三錢有奇歲徵秋糧除支放兵米廩餼外尙餘米四千三百六十餘石並扣存項米於次年青黃不接之際詳請平糶照價批解道庫常平倉貯穀二萬七千二百八十七石有奇境內里四至孝里崇義里信順里仁和里大

黔南諸冊卷二
率漢民多於苗戶十之八九苗民不及漢莊十之二
三零星雜居依漢民爲佃戶通計四里共五百四十
四寨俱一例編入保甲學額文生歲科試皆十二名
武生歲試十二名義學一舊有龍岡書院僅存基址
現議修縣屬至孝里三甲居民歲納市斗白米二十
八石七斗六升信順里羊橋六寨歲徵土租銀五十
三兩四錢有奇皆解充貴山書院膏火本城札佐烏
江三處係貴陽營分防外委三員每汛兵丁
名由縣支發口糧陸廣黃沙二汛外委各一員係黔
西營借地分防兵糧由黔西州支領縣境爲遵義五

屬並仁懷廳及通蜀孔道設有塘鋪遞送公文土司
二明洪武五年土人蔡永昌歸附授底寨正長官司
八年又以從征官梅忠副之今並承襲樹宜杉梓楓
香青桐青桐尤多民藉之以養蠶收繭果惟蘋婆是
專產白巖紅巖產水銀今歸貴筑管理間產硝磺非
奉文不準開採有烏江陸廣茶山三渡黃沙合口二
幫渡額徵收稅課銀六百九十兩稅羨銀二十五兩
五錢場市十七各有定期陸廣烏江黃沙三處尤爲
西北要隘設十五塘大道十一僻徑四苗有青苗花
苗養牛苗狝家苗長頭苗五種服飾均與漢民同

黔南識略卷二終

